

視事當用淺淡服卒哭後服色亦當次次稍降適因下問敢陳曲折非敢以
己意斷定而措語未瑩不能達意伏承聖教惶隕戰灼人臣負此罪名何所
措身臣以禮官議禮節目既違聖旨而迷不知變以中節決難仍冒伏乞亟
正臣罪以完大禮 荅曰省疏具悉卿其安心○卯時黑雲一道如氣橫掩日
光色亦是夜南方有氣如火赤光照地○丁未忠清道結城地有移石之變監
司鄭廣敬啓聞○以金尚容為左叅贊徐渚為右叅贊尹衡彥為司諫閔應亨
為掌令鄭百昌為副應教李基祚為校理李景魯為正言○初昏流星出狼星
上入鬼星下夜南方有氣如火光○戊申諫院上劄曰孝者百行之源萬化之
本聖人於一部孝經論之詳矣然帝王之孝與臣庶不同其為行也必順於天
地宜於祖宗悅服於卿士大夫得歡心於萬姓然後教化流通基命鞏固方可
為聖人之達孝矣恭惟主上殿下至德純行得之天性潛龍之日固已格于
上下即祚以來上奉慈殿旁侍別宮誠禮無盡人無間然粵自啓運宮寢疾
之後其於侍藥致養之道無所不用其極神理難知竟遭大故殿下雖外迫
公議持服之制俯從降殺至於哭踊哀毀實過情文聖孝之懿高出百代凡
有血氣孰不欽仰然臣等區區之意竊恐殿下至誠所發不能無過於中道